



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.144/2025

Paneli Zgjedhor për Ankesa dhe Parashtresa (PZAP), i përbërë nga gjyqtarët: Ramush Bardiqi kryesues, Hajriz Hoti dhe Bujar Muzaqi anëtarë, duke vendosur përkitazi me ankesën e subjektit politik Partia Demokratike e Kosovës (PDK), me seli në Prishtinë, kundër subjektit politik Lëvizja Vetëvendosje (LVV), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore për Kuvendin e Republikës së Kosovës, që do të mbahen më datë 09 Shkurt 2025, në seancën e panelit të mbajtur me 25.01.2025, mori këtë:

V E N D I M

I. Pranohet e bazuar ankesa e subjektit politik Partia Demokratike e Kosovës (PDK), me seli në Prishtinë, Anr.144/2025 e datës 23.01.2025.

II. Subjektit politik Lëvizja Vetëvendosje (LVV), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjorbë në lartësi prej 4,000.00 (katërmijë) euro.

III. Detyrohet Subjekti politik Lëvizja Vetëvendosje (LVV), me seli në Prishtinë, që gjorbën e shqiptuar si në pikën -I-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datë 23.01.2025 PZAP-i ka pranuar një ankesë nga subjekti politik Partia Demokratike e Kosovës (PDK), me të cilën pretendon se me datë 22 janar 2025, kandidati për deputet nga radhët e Lëvizjes Vetëvendosje, z. Valon Ramadani, ka publikuar një video në rrjetin social Tik-tok, e cila vazhdon të jetë e pranishme në profilin e tij, ku i njëjti përgjatë një takimi të mbajtur me mbështetës të subjektit politik LVV, përdorë gjuhë nxitëse dhe urrejtëse kundrejt partive kundërshtarë, konkretisht, i njëjti përgjatë fjalimit në këtë takim, deklaroi se "*Angazhoni sa të mundeni që me mujt me mbërri përqindjen ndoshta edhe ma shumë se sa që u fitu në herën e fundit, që me mujt njëherë e përgjithmonë qeta hajna mi qu edhe në burg, se hi veç në shpi, por me i qu edhe në burg.*" Përmbajtja e këtyre deklaratave pa mëdyshje përbën përdorim të gjuhës nxitëse dhe urrejtëse ndaj subjekteve kundërshtarë politike, ku i njëjti kundërshtarëve të tij politik i referohet me termin "hajna".

PDK vlerëson se në veprimet e z. Valon Ramadani janë konsumuar të gjitha elementet e veprimit të ndaluar, të përcaktuar në nenin 34, paragrafi 1, nën paragrafi . 1 .1 1 të Ligjit për Zgjedhjet e

Përgjithshme në Republikën e Kosovës. Parashtruesi ka bashkangjitur ankesës si provë: CD me përmbajtje të videos së publikuar nga z. Valon Ramadani në rrjetin social.

Në përgjigje në ankesë të paraqitur me datë 25.01.2025, subjekti politik Lëvizja Vetëvendosje (LVV) ka kundërshtuar ankesën e paraqitur nga subjekti politik Partia Demokratike e Kosovës (PDK) me pretendimet e ankuesit të ngritura ndaj kandidatit për deputet Valon Ramadani i cili në rrjetin social Tik Tok ka përdorur gjuhë të papërshtatshme kur ka deklaruar se "hajnat mi qu edhe në burg" me çka ka rënë ndesh me nenin 34 pika 1 nën paragrafi 1.11 të LZP-së, nga leximi këtij neni nuk sanksionohet përshkrimi i punës së organeve të drejtësisë dhe sigurisë ashtu siç ka deklaruar kandidati Valon Ramadani, por sanksionohen gjuha e urrejtjes, nxitja, dhuna dhe rastet tjera të përmendura në këtë normë. Çka e bën deklaratën e kandidatit Ramadani të lejuar pasi që nuk është e vërtetë se i njëjti ka aloduar në subjektet politike kundërshtarë gjatë kësaj deklaratë, për arsye se ai shprehimisht këtë nuk e ka thënë. Konsiderojmë se paragjykimi për mendimet e brendshme dhe vullnetin e brendshëm nuk mund të jetë objekt i ankesës edhe po që se z. Ramadani ka aloduar tek kundërshtarët politik ashtu siç ankuesi e ka përshkruar në pikën 3 të ankesës, duke parashtruar fakte të rreme në deklaratimet në ankesë të cilat pikërisht këto deklaratime të shtrembëruara sanksionohen në bazë të LZP-së, dhe atë me nenin 119.6 dhe jo ajo çka pretendon ankuesi.

Andaj kërkujmë nga Paneli Zgjedhor për Ankesa dhe Parashtresa, që duke u ndërlidhur me faktet dhe interpretimet e normave të pretenduara si shkelje ta refuzoj si të pabazuar këtë ankesë.

Paneli, pasi që shqyrtoj të gjitha shkresat e lëndës, konstatoi se:

Ankesa është e bazuar

Paneli, pas shikimit të bërë të video incizimit të ofruar si provë materiale e cila është publikuar në rrjetin social të kandidatit për deputet të subjektit politik Lëvizja Vetëvendosje (LVV) ,Valon Ramadani, dhe se e njëjta video nga hulumtimet e Panelit është vërtetuar se ekziston në rrjetin social të kandidatit në fjalë, prej nga rrjedh se ky postim ka për qëllim etiketimin e subjekteve tjera politike, dhe promovimit të subjektit politik LVV, e veçanërisht etiketimin dhe krahasimin negativ të subjektit politik, në atë mënyrë që përmes rrjetit social ka publikuar video, përkatësisht shpërndarjen e videos së tij të rrjetit social foto Tik Tok.

Sipas Panelit paraqitja e video incizimit nga ana e kandidatit të subjektit politik LVV, në të cilën përdorë gjuhë nxitëse dhe urrejtëse kundrejt partive kundërshtarë në kuadër të fushatës zgjedhore, konsiderohet shkelje e rregullave zgjedhore në Kosovë, ngase veprimi i marrë në kohë të fushatës zgjedhore ka për qëllim të krijojë një lidhje negative ose të nxisë ndjenja të urrejtjes dhe krijoj atmosferë tensioni dhe përçarjeje. Paneli vlerëson se partitë dhe kandidatët janë të detyruar të respektojnë etikën zgjedhore dhe të shmangin veprime që mund të sjellin pasiguri apo të përkeqësojnë atmosferën politike. Përdorimi i gjuhës së tillë mund të dëmtojë procesin demokratik dhe të rrisë tensionet në vend. Kjo është një shkelje e rregullave që kërkojnë një fushatë paqësore, të ndershme dhe të drejtpërdrejtë.

Përdorimi i një gjuhe të tillë është në kundërshtim me nenin 34 pika 1.11), e LZP-së, me të cilën përcaktohet: *"Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: ... 1) përdorimi i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një*

akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve ose duke publikuar ose përdorur fotografi, simbole ose çfarëdo materiali tjetër që ka ose mund të ketë ndikim të tillë". Neni 120 paragrafi 1 nën paragrafi 1.3 të LZP-së thekson se në rast se PZAP përcakton se ka ndodhur shkelje e të këtij ligji ose e rregullave të KQZ-së, mundet të vendosë një gjobë ndaj një subjekti politik, në vlerë deri në pesëdhjetëmijë (50,000.00) Euro.

Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit.


Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se veprimi që përben përsëritje të shkeljes për nga natyra është i njëjtë apo ngjashëm, subjektit politik që ka bërë shkelje të legjislacionit zgjedhor, apo ka bërë shkelje të legjislacionit edhe në proceset e mëparshme zgjedhore, që konsiston në faktin se subjekti politik LVV, ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore.

Paneli me rastin e shqiptimit të gjobës ka pasur parasysh edhe praktikën e mëhershme për rastet të ngjashme si dhe faktin që subjekti politikë në fjalë ka bërë shkelje të natyrës së njëjtë e për të cilat shkelje panel ka shqiptuar dënime me gjobë..

Përveç të cekurave më lartë, Paneli me rastin e vendosjes i vlerësoi edhe të gjitha pretendimet e subjektit politik Lëvizja Vetëvendosje (LVV), në kuadër të pretendimeve të theksuara në përgjigje në ankesë, mirëpo të njëjtët ishin të pabazuara, të pa qëndrueshme dhe pa bazë ligjore si në dispozitat e Ligjit për Zgjedhje, dhe si të tilla nuk ishin me ndikim për një vendim ndryshe, për çka Paneli, vlerësoi dhe vendosi si në dispozitiv të këtij vendimi.

Nga arsyet e theksuara më lart, e në kuptim të nenit 34 paragrafi 1 nën paragrafi 1.11, nenit 118 paragrafi 1, neni 120 paragraf 1 nën paragrafi 1.3, të LZP-së, nenit 10 paragrafi 1, nën paragrafi 1.2 të Rregullores Nr.01/2024 për Procedurat e Parashtrimit dhe Vendosjes së Ankesave vendosi si në dispozitiv të këtij vendimi.

Paneli Zgjedhor për Ankesa dhe Parashtrësia
Anr. 144/2025 më datë 25.01.2025



Këshilla Juridike: Kundër këtij vendimi nuk është e lejuar ankesa sipas nenit 118 par. 4 të LZP-së.